

周

禮

正

義

周禮正義卷六十五

瑞安孫詒讓學

秋官司寇第五鄭目錄云象秋所立之官寇害也秋者道也如秋義殺害收取歛藏於萬物也天子立司寇使掌邦刑刑者所以驅恥惡納人於善道也疏秋官司寇第五者阮元云第五唐石經作第九非鄭目錄云象秋所立之官者司寇於六官爲第五於四時當秋故象之而稱秋官大戴禮記千乘篇云司寇司秋以聽獄訟是也春秋繁露五行相勝篇以司寇爲北方水官與經義不合不足據云寇害也者說文支部云寇暴也又山部云害傷也史記衛世家集解引馬融書注亦云司寇主誅寇害云秋者道也者鄉飲酒義云秋之言愁也愁之以時察守義

者也鄭彼注云愁讀爲孳孳斂也察猶察殿殺之貌也說文
手部云孳束也引詩曰百祿是孳今詩幽風破斧孳作適又說
文彳部云適迫也重文道或作箇案道孳字通鄭說卽本鄉飲
酒義又釋名釋天云秋縮也縮迫品物使時成也縮與道音義
亦同云如秋義殺害收取斂藏於萬物也者御覽時序部引洪
範五行傳云西方金其性義春秋繁露陰陽義篇云秋怒氣也
故殺御覽時序部引三禮義宗云秋之言孳縮之意陰陽出地
始殺萬物管子形勢解云秋者陰氣始下故萬物收是秋主義
又兼殺害收取斂藏萬物司寇主刑亦象之也書周官僉孔傳
亦云秋司寇刑姦順時殺云天子立司寇使掌邦刑刑者所以
驅恥惡納人於善道也者說文刀部云刑剄也从刀开聲又开

部云荆罰舉也从井从刀易曰井法也井亦聲案凡刑法字並當作刑今隸變作刑失之說苑政理篇云刑者懲惡而禁後者也白虎通義刑罰篇云聖人治天下必有刑罰何所以佐德助治順天之度也故懸爵賞者示有勸也設刑罰者明有所懼也

周禮

鄭氏注

惟王建國辨方正位體國經野設官分職以爲民極乃立秋官司寇使帥其屬而掌邦禁以佐王刑邦國禁所以防姦者也刑正人之法孝經說曰刑者例也過出罪施疏使帥其屬而掌邦禁以佐王刑邦國者大宰六典云五日刑典以詰邦國以刑百官以糾萬民刑禁事相因邦禁亦刑典也書立政云王左右常伯常任準人又云立政任人準夫牧作三事偽孔傳云準人平

法謂士官隸釋漢石經準作辟辟法義同平法亦掌邦禁之義
彼蓋通司寇長屬言之立政孔疏謂專屬士師未塙 注云禁
所以防姦者也者廣雅釋詁云禁止也謂立邦禁所以防遏姦
惡於未犯之前賈疏云案士師五禁以左右刑罰王者恐民以
姦入罪故先設禁示之防其姦惡若有不忌爲姦然後以刑罪
之云刑正人之法者大司寇注云刑亦法也謂刑者立法所以
正人於已犯之後引孝經說者賈疏云孝經援神契五刑章曰
刑者側也過出罪施者下側爲著也行刑者所以著人身體過
誤者出之實罪者施刑是以尙書云眚災肆赦怙終賊刑引之
者證司寇行刑當審慎也詒讓案王制云刑者側也側者成也
一成而不可變故君子盡心焉此說與孝經緯同刑官之屬大

寇卿一人小司寇中大夫二人士師下大夫四人鄉士上士八
人中士十有六人旅下士三十有二人士察也主察獄訟之事
者鄭司農說以論語曰柳下惠爲士師鄉士主六鄉之獄疏大
司寇卿一人者刑官之正也書立政云司寇蘇公左成十一年
傳云昔周克商蘇忿生以溫爲司寇又定四年傳云康叔爲司
寇書敘云呂命穆王訓夏贖刑作呂刑僞孔傳云呂侯見命爲
天子司寇並卽此大司寇卿也云小司寇中大夫二人者刑官
之貳也云士師下大夫四人者刑官之攷也云鄉士上士八人
者賈疏云其職云掌國中兼百里內六鄉以八人分主六
鄉故謂之鄉士詒讓案鄉士亦謂之正王制云成獄辭史以獄
成告於正正聽之正以獄成告於大司寇注云正於周鄉師之

屬案鄉師蓋鄉士之譌故彼注下文卽引鄉士職文爲證此正與大司寇爲秋官大正異國中六鄉同獄蓋卽與大司寇所治官府同處故鄉士卽以司寇之屬士爲之鄉士職云掌國中者鄉士以主六鄉之獄訟爲專職而六鄉地與王區域郭相比故國中之獄訟亦鄉士兼掌之本職不云掌六鄉而云掌國中者舉內以賅外實則此經凡言國中者並與鄉異地六鄉之治雖得兼及於國中而國中之名則不通於六鄉也注疏說並未憭互詳本職疏注云士察也者爾雅釋詁文郭注云士師官主聽察云主察獄訟之事者賈疏云訓士爲察者取察理獄訟是以刑官多稱士案上代以來獄官之名有異是以月令命理墮傷察制鄭注云有虞氏曰士夏曰大理周曰大司寇天子諸

侯同故魯有司寇晉魏絳亦云歸死於司寇至於衰世國異政
家殊俗官名隨意所造故僖二十八年晉有士榮爲大士文十
年楚子西云臣歸死於司敗論語云陳司敗昭十四年士景伯
如楚叔魚攝理是後官號不同者也詒讓案古通以士爲刑官
之稱書舜典皋陶作士卽刑官之正故大司寇亦曰大士大或
作泰晏子春秋諫上篇景公曰爲夫婦獄訟之不正乎則泰士
子牛存矣周書王會篇亦有泰士彌士蓋小司寇也士又
通作理文子精誠篇云皋陶暗而爲大理管子法法篇作皋陶
爲李又小匡篇云賓胥無爲大司理理李字通漢書胡建傳引
黃帝李法則黃帝時已立此官李法卽司寇官法也互詳大司
徒疏云鄭司農說以論語曰柳下惠爲士師者微子篇文何氏

集解引孔安國云士師典獄之官也引之者證彼士師與此士師官同曲禮六大亦有大士王引之謂卽士師之屬則與刑官之正同名非周制也云鄉士主六鄉之獄者謂主國中至距王城百里六鄉之獄也今案鄉士兼主國中獄而鄉里實在國城之外官名鄉士者以六鄉地大獄訟繁多是其專職也府六人史十有二人胥十有二人徒百有二十人疏史十有二人者卽王制治獄之史鄭注云史司寇吏也國語晉語云以煩刑史亦卽此章注以刑史爲司寇與大史非也賈疏云自大司寇以下至胥徒皆是同官別職故各有職而同府史也

遂士中士十有二人府六人史十有二人胥十有二人徒百有二十人遂士主六遂之獄者疏遂士者此官與縣土方士訝士

並分主郊遂公邑都家邦國獄訟之官故次鄉士之後 注云
遂士主六遂之獄者者此與上注鄉士主六鄉之獄文例同疑
亦先鄭說也不著鄭司農云者注引舊說亦有家上章而省者
如鍾師注云鼓讀如莊王鼓之鼓卽冢上章鄭司農云騶虞聖
獸而省是其證也賈疏云其職云掌四郊四郊有六遂之獄故
也鄉士主六鄉之獄遂士主六遂之獄所以鄉士使上士官尊
而人少遂士使中士官卑而人多者六遂去王遠故官卑以六
遂在遠郊外兼主公邑地廣人眾故官多方苞云疏謂遂士兼
主六遂中公邑之獄訟非也其職曰各掌其遂之民數而糾其
戒令則不兼公邑明矣上獄訟於國司寇職聽其成書其成與
聽獄訟者至都家始有異文則甸稍縣都之公邑並掌於縣士

可知矣縣士職與鄉士遂士無異文以其爲王朝之吏而所掌公邑耳案方說是也遂士掌六遂之獄而兼掌六鄉外之四郊官名遂士者亦以六遂地大是其專職也地遠又兼掌四郊故官特多至六遂之餘地爲公邑者其獄訟自別掌於縣士注疏說並非互詳縣士職疏

縣士中士三十有二人府八人史十有六人胥十有六人徒百有六十人距王城三百里至四百里曰縣縣士主縣之獄者疏

注云距王城三百里至四百里曰縣者賈疏云案其職云掌野謂掌三等公邑之獄故鄭於縣士職注云二百里以外至三百里曰野三百里以外至四百里曰縣四百里以外至五百里曰都郊外曰野大摠言之故其職云掌野其六遂之中公邑之獄

遂士兼掌之矣既三處獄並掌而此注云距王城三百里至四
百里曰縣似不主三百里中五百里中獄者縣在四百里中故
舉中以言其實外內皆掌之耳詒讓案此先鄭義也本職注引
先鄭云掌三百里至四百里與此注義正同後鄭則謂縣爲三
處公邑之通名不定三百里至四百里地本職注破先鄭甚詳
不應於此復襲其說疑此與遂士注並引先鄭說不著鄭司農
云者亦冢鄉士注而省後鄭固不從此義也又此官實掌四等
公邑賈云三等者謂甸公邑掌於遂士其說非也詳前疏云縣
士主縣之獄者者此與鄉士注文例同蓋亦先鄭說也縣士掌
野亦謂之野司寇左襄十八年傳鄭災使野司寇各保其徵杜
注云野司寇縣士也

方士中士十有六人府八人史十有六人胥十有六人徒百有六十人方士主四方都家之獄者疏注云方士主四方都家之獄者者賈疏云案其職云掌都家鄭彼注云都王子弟及公卿之采地家大夫之采地主此三等采地之獄采地在王城四方故云方士也是以鄭此注云方士主四方都家之獄者也

訝士中士八人府四人史八人胥八人徒八十人訝迎也士官之迎四方賓客疏訝士者賈疏云案其職云掌四方之獄訟非直迎賓客爲獄訟爲主故亦士言之也注云訝迎也者後掌

訝注同說文言部云訝相迎也周禮曰諸侯有卿訝也重文訝訝或從辵聘禮注云以君命迎賓謂之訝訝迎也云士官之迎四方賓客者本職云邦有賓客則與行人送逆之是也訝士或

亦謂之行理詳木職疏

朝士中士六人府三人史六人胥六人徒六十人朝士主外朝之法疏朝士者賈疏云案其職云掌建邦外朝之法左九棘右

九棘之事以朝士爲詢眾庶獻疑獄故屬秋官但序官之法秋官雖爲刑獄所施至於防禁之屬皆在秋官又於賓客是主人所敬故鄉飲酒坐賓於西北象天地巖凝之氣始於西南盛於西北是以賓客之事亦屬焉注云朝士主外朝之法者賈疏

云天子諸侯皆三朝內朝二路門外與路寢庭是也外朝一此朝在皋門內庫門外是也詒讓案韓非子外儲說右上云荆莊王有茅門之法曰羣臣大夫諸公子入朝馬蹏踐雷者廷理斬其駟戮其御彼廷理蓋卽朝士諸侯三門外朝在雉門外說文

佳部雉古文作𪔐或省為弟與茅形近故韓子作茅門史記魯世家築茅闕門即雉闕門也

司民中士六人府三人史六人胥三人徒三十人司民主民數

疏司民者此官掌民數小司寇掌獻民數於王故司民亦屬司

寇 注云司民主民數者據本職文

司刑中士二人府一人史二人胥二人徒二十人**疏**司刑者此

官與司刺並總掌刑法之事故亦屬司寇

司刺下士二人府一人史二人徒四人刺殺也三訊罪定則殺

之**疏**注云刺殺也者爾雅釋詁文小司寇及本職注並同說文

刀部云君殺大夫曰刺刺直傷也通言之凡殺皆曰刺云三訊

罪定則殺之者小司寇本職注同以其職有訊羣臣訊羣吏訊

萬民等又云聽民之所刺宥以施上服下服之刑是知三說罪
定民言當刺則殺之也春秋經書魯殺大夫並謂之刺僖二十
八年經公子買戍衛不卒戍刺之又成十六年經刺公子偃左
傳杜注云內殺大夫皆書刺言用周禮三刺之法示不枉濫也
穀梁范注說同案春秋書刺卽說文刺之本訓然與此經之義
亦足互證但三刺之法兼有宥赦則刺者不必皆殺此官以司
刺爲名者亦偏舉一端爲義

司約下士二人府一人史二人徒四人約言語之約束疏司約
者此官與司盟並掌盟約之官與刑禁事相成故亦屬司寇

注云約言語之約束者釋名釋書契云約約束之也大史注云
約劑要盟之載書及券書也盟辭券書並以言語相約束之事

也

司盟下士二人府一人史二人徒四人盟以約辭告神殺牲歃

血明著其信也曲禮曰涖牲日盟疏司盟者盟必有約書故冢

司約而次之云府一人者掌盟書之藏左僖五年傳云虢仲虢

叔爲文王卿士勳在王室藏於盟府杜注云盟府司盟之官又

三十六年傳說成王賜周公大公爵亦云載在盟府是也 注

云盟以約辭告神殺牲歃血明著其信也者說文罔部云盟周

禮曰國有疑則盟諸侯再相與會十二歲一盟北面詔天之司

慎司命盟殺牲歃血珠盤玉敦以立牛耳从罔从血重文盟篆

文从明又盟古文从明今經典並从古文省釋名釋言語云盟

明告其事於神明也案約辭卽本職所謂盟載是也殺牲歃血

詩玉卣疏引曲禮曰進牲曰盟者證盟有殺牲之事鄭彼注云
蒞臨也次用牲臨而讀其盟書孔疏云異義云禮約盟不今春
秋公羊說古者不盟結言而退故穀梁傳云詒誓不及五帝盟
詛不及三王交質子不及二伯詛盟非禮古春秋左氏云周禮
有司盟之官殺牲歃血所以盟事神明又云凡國有疑盟詛其
不信者是知於禮得盟許君謹案從左氏說以太平之時有盟
詛之禮鄭氏不駁從許慎義也盟詛不及三王非鄭所用然盟
牲所用許慎據韓詩云天子諸侯以牛豕大夫以犬庶人以雞
又云毛詩說君以豕臣以犬民以雞又左傳云鄭伯使卒出豶
行出犬雞以詛射穎考叔者又云衛伯姬盟孔慳以豶鄭云詩
說及鄭伯皆謂詛小於盟周禮戎右職云盟則以玉敦辟盟遂

役之鄭注云役之者傳敦血授當歐者下云贊牛耳桃菊又左傳云孟武伯問於高柴曰諸侯盟誰執牛耳然則盟者人君以牛伯姬盟孔慳以豶下人君也穀梁僖九年范注引鄭君云盟牲諸侯用牛大夫用豶詒讓案國語晉語叔向云成王盟諸侯於岐陽是周初有盟禮故此經設司盟之官觀禮記方明之祭穀梁之義必不可通故許鄭咸不從之異義說盟牲引毛詩說者小雅何人斯傳文彼詩云出此三物以詛爾斯蓋據詛牲而言與左傳鄭伯詛射穎考叔正同孔疏謂詛用一牲非也其盟牲當襍用六牲不徒以豕犬雞戰國策齊策云齊衛先君刑馬壓羊盟墨子明鬼篇云齊莊君之臣王里國中里徵訟三年而獄不斷乃使之人共一羊盟齊之神社史記平原君傳毛遂結

楚趙之盟亦兼取雞狗馬血是皆雜用六牲唯公羊襄二十七
年傳說衛公子鱒與妻子盟則以雉爲不用牲竊意六牲之中
大盟詛當用大牲小盟詛則用小牲韓毛許鄭並謂尊卑異用
諸說乖異未容泥也

職金上士二人下士四人府二人史四人胥八人徒八十人職
主也疏職金者賈疏云案其職云掌凡金玉之戒令又云掌受
金罰貨罰亦是刑獄之事故在此 注云職主也者亨人注同

司厲下士二人史一人徒十有二人犯政爲惡曰厲厲土主盜
賊之兵器及其奴者疏司厲者掌舉沒盜賊人民任器之等亦
刑罰之事故屬司寇任器與罰金同入司兵故冢職金而次其
後 注云犯政爲惡曰厲者毛詩小雅正月傳云厲惡也言盜

賊之人干犯政令而爲姦惡此官主治之也云厲士主盜賊之兵器及其奴者者厲士卽謂司厲下士其職云掌盜賊之任器先鄭注釋爲兵器又云其奴男子入于罪隸女子入于春槩是也

犬人下士二人府一人史二人賈四人徒十有六人疏犬人者此亦以五行象類屬秋官也庖人注云犬屬司寇金也月令注云犬金畜說文犬部云犬狗之有縣蹶者也賈疏云案其職云凡祭祀共犬牲犬是金畜故五行傳云二曰言言之不從則有犬禍故連類在此

司圜中士六人下士十有二人府三人史六人胥十有六人徒百有六十人鄭司農云圜謂圜土也圜土謂獄城也今獄城圜

司圜職中言凡圜士之刑人也以此知圜謂圜士也又大司寇職日以圜士聚教罷民故司圜職曰掌收教罷民疏司圜者此官與掌囚掌戮並掌刑獄囚殺之事故亦屬司寇圜士收教罷民其罪輕故司圜列掌囚之前注鄭司農云圜謂圜士也圜士謂獄城也者大司徒注義同云今獄城圜者文選司馬遷報任安書云幽於圜牆之中是漢時獄亦圜牆故先鄭舉以爲說云司圜職中言凡圜士之刑人也以知此圜謂圜士也者明訓圜爲圜士之意云又大司寇職曰以圜士聚教罷民故司圜職曰掌收教罷民者證圜士卽是收教罷民之獄也

掌囚下士十有二人府六人史十有二人徒百有二十人囚拘也主拘繫當刑殺之者疏掌囚者此官掌五刑罪囚之事重於

圖土之罷民故次司圖之後 注云囚拘也者爾雅釋言文說
文口部云囚繫也拘繫義同云主拘繫當刑殺之者者據本職
云及刑殺奉以適朝士以適市而刑殺之故知是主拘繫當刑
殺之人也

掌戮下士二人史一人徒十有二人戮猶辱也既斬殺又辱之

疏掌戮者此官掌刑殺之事重於拘囚故次掌囚之後 注云

戮猶辱也既斬殺又辱之者說文戈部云戮殺也廣雅釋詁云
戮辱也戮本義爲殺引申爲戮尸之稱本職注云戮謂膊焚辜
肆國語晉語云請殺其生者而戮其死者韋注云陳尸爲戮是
戮爲既死辱尸之名也

司隸中士二人下士十有二人府五人史十人胥二十八徒二

百人隸給勞辱之役者漢始置司隸亦使將徒治道溝渠之役後稍尊之使主官府及近郡疏司隸者帥領五隸五隸罪隸是罪人四翟則夷狄之虜也故亦屬司寇注云隸給勞辱之役者者凡隸皆男子爲奴給役之名國語周語韋注云隸役也本職云帥其民役國中之辱事故云給勞辱之役又左昭七年傳云士臣阜阜臣與與臣隸孔疏引服虔云隸隸屬於吏也義亦通云漢始置司隸亦使將徒治道溝渠之役後稍尊之使主官府及近郡者漢書百官公卿表云司隸校尉周官武帝征和四年初置持節從中都官徒千二百人捕巫蠱督大姦猾後罷其兵察三輔三河弘農續漢書職官志云建武中并領一州此云使將徒治道溝渠之役卽謂將中都官徒也與周官職掌略同

云主官府及近郡卽謂後罷兵察三輔三河弘農及建武後領州也

罪隸百有二十八盜賊之家爲奴者疏罪隸者罪經例用古字當作臯石經及各本並誤詳甸師疏 注云盜賊之家爲奴者者賈疏云此中國之隸言罪隸古者身有大罪身旣從戮男女緣坐男子入於罪隸女子入於春槩故注云盜賊之家爲奴者論讓案旣夕記注云隸人罪人也今之徒役作者也又左襄二十三年傳云斐豹隸也著于丹書杜注云蓋犯罪沒爲官奴則凡有罪罰作者並入罪隸不徒盜賊之家矣惠士奇云鴟冠子世兵篇曰百里奚官奴官奴者罪隸之奴也

蠻隸百有二十八征南夷所獲疏注云征南夷所獲者職方氏

先鄭注云南方曰蠻故征南方所獲俘虜謂之蠻隸也

閩隸百有二十人閩南蠻之別疏注云閩南蠻之別者職方氏

注義同詳彼疏

夷隸百有二十人征東夷所獲疏注云征東夷所獲者職方氏

先鄭注云東方曰夷故征東夷所獲俘虜謂之夷隸也

貉蠻百有二十人征東北夷所獲凡隸眾矣此其選以爲役員

其餘謂之隸民疏注云征東北夷所獲者以東北夷曰貉故東

北方所獲俘虜謂之貉隸也以上四隸司隸通謂之四翟之隸

師氏又云四夷之隸統言之夷翟得通稱故注並云夷也但職

方氏有四夷八蠻七閩九貉五戎六狄而此獨無戎狄之隸或

夷可兼戎貉可兼狄與互詳職方氏疏云凡隸眾矣此其選以

爲役員其餘謂之隸民者統五隸而言也賈疏云蠻隸以下皆百二十人謂隸中還取善者以爲役之員數爲限其餘馭者以爲隸民故司隸職云帥其民而搏盜賊役國中之辱事之等是百二十人外謂之民者也

布憲中士二人下士四人府二人史四人胥四人徒四十人憲表也主表刑禁者疏布憲者此官與禁殺戮禁暴氏皆總主刑禁之官故亦屬司寇注云憲表也主表刑禁者者憲表小司寇及本職注並同小宰注云憲謂表縣之若今新有法令云是憲爲表示之義其職云正月之吉執旌節以宣布四方而憲邦之刑禁此官卽取宣布憲表爲名也

禁殺戮下士二人史一人徒十有二人禁殺戮者禁民不得相

殺戮疏注云禁殺戮者禁民不得相殺戮者民間擅相殺戮易
以北亂故設官以禁之

禁暴氏下士六人史三人胥六人徒六十人疏禁暴氏者暴經
例用古字當作豷石經及各本並誤詳地官敘官疏大司寇五
刑五日官刑上愿糾暴此官所掌卽糾暴之事

野廬氏下士六人胥十有二人徒百有二十人廬賓客行道所
舍疏野廬氏者以下至司烜氏六官並掌國道路溝池之禁及
水禁夜禁火禁之事故亦屬司寇而次諸總掌刑禁官之後

注云廬賓客行道所舍者漢書食貨志云在埜曰廬賈疏云見
遺人云十里有廬三十里有宿故知之也惠士奇云十里曰廬
三十里曰宿五十里曰市宿有路室市有候館皆謂之廬故掌

周禮正義

禮本十五

四百一十二

達道路之官爲野廬氏

蜡氏下士四人徒四十人蜡骨肉腐臭蠅蟲所蜡也月令曰掩

骼埋骹此官之職也蜡讀如狙司之狙疏注云蜡骨肉腐臭蠅

蟲所蜡也者段玉裁云說文虫部曰蜡蠅蛆也周禮蜡氏掌除

骹肉部曰蛆蠅乳肉中也通俗文同謂蠅所聚乳也案段據說

文爲釋是也蜡蛆字異而義同引月令曰掩骼埋骹此官之職

也者釋文埋作狸云本又作埋骹本又作髡案蜀石經作埋髡

今禮記孟春令同說文骨部引明堂月令亦作埋骹彼文與此

蜡氏職掌除骹合故云此官之職也狸卽葬之借字俗作埋髡

或骹字詳鼈人及本藏疏賈疏云案彼注骨枯曰骼肉腐曰骹

掩亦埋但骼骹不同故別言也言骼骹者凡人物皆是云蜡讀

如狙司之狙者段玉裁云擬其音也狙司卽覩伺史漢狙擊秦皇帝應劭云狙伏伺也方言掩索取也自關而西曰索或曰狙郭注云狙伺也三蒼狙伺也通俗文伏伺曰狙司伺古今字

雍氏下士二人徒八人雍謂隄防止水者也

疏

注云雍謂隄防

止水者也者雍卽離之隸變正字當作邕說文川部云四方有水自邕成池者是也經典多借離爲之白虎通義辟雍篇云雍者壅之以水穀梁僖九年傳云毋雍泉俗又作壅廣雅釋詁云壅障也月令孟秋云完隄防謹壅塞以備水潦說文阜部云隄唐也防隄也稻人云以防止水是隄防並所以邕障水使止不行故謂之雍也

萍氏下士二人徒八人鄭司農云萍讀爲蜚或爲萍號起雨之

萍玄謂今天問萍號作萍爾雅曰萍萍其大者蘋讀如小子言
平之平萍氏主水禁萍之草無根而浮取名於其不沈溺疏注
鄭司農云萍讀爲蜚或爲萍號起雨之萍玄謂今天問萍號作
萍者段王裁云此注轉寫譌誤云今天問萍號作萍此謂今之
天問與舊天問字異不當皆作萍也疑是鄭司農云萍或爲蜚
讀爲萍號起雨之萍玄謂今天問萍號作萍蓋司農說或作蜚
蠖蜚之蜚不可通故讀爲萍號起雨之萍王逸楚辭注云萍萍
蘋雨師名也號呼也興起也言雨師號呼則雲起而雨下萍一
作萍一作萍司農易蜚爲萍蘋字今不得其解後鄭則云天問
萍蘋字今本多作萍蘋考之爾雅萍與萍正是一物而兩字古
音同部故天問通用司農既讀蜚爲萍則亦可徑從經作萍案

段校近是陳壽祺據王逸楚辭注本改作今天問萍莢作萍云
後鄭下引爾雅正明萍莢一物其說亦通引爾雅曰萍莢其大
者蘋者釋草文釋文云萍本亦作苹案郭本爾雅作萍注云水
中浮萍江東謂之藻釋草別有苹蘋蕭詒審注意疑後鄭以萍
爲水草與苹爲蘋蕭不同鄭所見爾雅自作萍故引證此經之
萍明其不必改萍釋文或本作苹乃後人依郭本改與經注上
下文並不相應也說文艸部云苹萍也無根浮水而生者萍苹
也水部云萍苹也水艸也三字不同玉篇艸部及廣韻十五青
並以萍莢爲一字此與爾雅說文不合不足據也云讀如小子
言平之平者擬萍字之音也小子言平未詳所本云萍氏主水
禁萍之草無根而浮取名於其不沈溺者段玉裁云經之萍氏

取名於萍草之不沈溺也幾酒禁酒禁川游者皆令不沈溺

司寤氏下士二人徒八人寤覺也主夜覺者

疏

注云寤覺也者

小爾雅廣言文說文寢部云寐覺而有言曰寤云主夜覺者者賈疏云凡人之寐卧恆在寢得禁之者人有夜寐忽覺而漫出門者故謂之夜覺也莊存與云寤不寐也此官主常覺疏說誤案莊說近是夜覺謂警夜使人覺寤不犯禁也

司烜氏下士六人徒十有二人烜火也讀於衛侯燧之燧故書

燧爲烜鄭司農云當爲烜**疏**司烜氏者此官掌火禁兼掌墳燭

庭燎國語周語云火師監燎韋注云火師司火燎庭燎也董增

齡謂卽此司烜氏是也 注云烜火也者鄭謂自有烜字訓爲

火也說文火部以烜爲燿之或體云燿取火於日官名舉火曰

燿周禮曰司燿掌行火之政令重文烜或从亘陳壽祺云說文
曰取火於日官名此據司烜氏以夫燧取火於日言之其下又
曰舉火曰燿此據夏官司燿言之其下重文烜曰或从亘此亦
烜燿爲一字也高誘淮南汜論注亦曰燿取火於日之官也下
復引司燿之文許師賈景伯高師盧子幹其言皆有所受益諸
儒所見周禮司燿有作司烜者如世婦橐人環人之兩見故併
兩職解之也案陳說是也王昭禹方苞並引易說卦傳曰以烜
之謂此官掌取火於日故以司烜爲名亦通云讀如衛侯燬之
燬者春秋僖二十五年經衛侯燬滅邢說文火部云燬火也从
火毀聲春秋傳曰衛侯燬段玉裁云燬讀如衛侯燬之燬者言
其音義同耳亘聲在元寒烜刪山仙部毀聲在脂微齊皆灰部

合韵最近云故書燬爲垣者段玉裁云或云當作故書烜爲垣
案段引或說是也陳壽祺黃以周說並同蓋此章注中惟此燬
字爲涉上文而誤此外別無譌文蜀石經垣作烜則傳寫之誤
引鄭司農云當爲烜者先鄭定此字爲烜而後鄭從之也蜀石
經作當爲垣亦誤

條狼氏下士六人胥六人徒六十人杜子春云條當爲滌器之

滌玄謂滌除也狼狼扈道上

疏

條狼氏者此官與修閭氏並掌

道路閭里辟禁之事故亦屬司寇而次諸主禁官之後續漢書
輿服志劉注引干注云今卒辟車之屬案此本鄭說詳本職疏
云下士六人胥六人徒六十人者沈彤改六皆爲八云其職云
王出入則八人夾道公則六人此下士屬王富八人也下士之

夾道者八則隨而滌狼之胥亦當入胥爲什長胥八則徒當入
十也案沈說近是蔣載康說同然據本職賈疏則唐本已並作
六矣 注杜子春云條當爲滌器之滌者滌條聲類同賈疏云
讀從特牲少牢滌祭器等之滌也段玉裁云滌器之滌古音蓋
同條云立謂條除也者從杜讀而釋其義說文水部云滌洒也
大射義射人宿視滌注云滌謂灑器掃除射宮此官亦主掃除
道路也云狼狼扈道上者賈疏云謂不蠲之物在道猶今言狼
藉也

脩閭氏下士二人史一人徒十有二人閭謂里門 **疏**注云閭謂

里門者說文門部云閭里門也閭里中門也呂氏春秋仲夏紀
門閭無閉高注用許義案凡民所聚居通謂之里里外周而有

圍牆其門謂之閭閭卽里之外門其里中門別爲閭此官掌脩除國中塵里之閭司稼之邑閭則野外邑里之閭二者地異而名同此閭不必爲六鄉五比之閭里亦不必爲六遂五鄰之里也惠士奇云脩閭氏比宿櫟而守閭互互謂行馬櫟以行夜閭其門也管子曰閭閉無閭外內交通男女無別晏子春秋內篇曰急門閭之政而淫民惡之緩門閭之政而淫民說公羊成元年傳卻克賊孫許同時聘於齊二大夫相與踦閭而語移日然後去墨子公輸篇墨子自楚歸過宋天雨庇其閭中守閭者不內也則閭互之法有節者內之無節者諛之春秋及戰國皆然矣管子立政篇審閭閉慎筦鍵筦藏於里尉閭有司以時開閉凡出入不時衣服不中圈屬羣徒不順於常者閭有司見之復

無時所謂閭有司者卽脩閭氏歟

冥氏下士二人徒八人鄭司農云冥讀爲冥氏春秋之冥玄謂

冥方之冥以繩縻取禽獸之名疏冥氏者以下至庭氏十二職

並掌攻除鳥獸蟲蠹及草木之官以其亦是殺伐之事故並屬

司寇注鄭司農云冥讀爲冥氏春秋之冥者阮元云讀爲漢

書蕭該音義引作讀如此擬其音非改其義釋文所云冥如字

是也至後鄭始易其字義此作讀爲誤也王應麟云漢儒林傳

堂谿惠授泰山冥都都與筦路又事顏安樂故顏氏復有筦冥

之學冥氏春秋卽冥都也惠棟云冥都傳春秋故云冥氏春秋

夏本紀禹妣姓後有冥氏案阮王惠說是也漢書儒林傳顏注

云冥莫零反廣韻十五青引風俗通云冥氏漢有冥都爲丞相

史冥亦讀如字與陸顏讀同云玄謂冥方之冥者段玉裁云冥方卽算法之方冪也釋文曰冥又莫歷反此音當專屬後說案段說是也依後鄭讀則冥與天官冪人之冪字同賈疏謂後鄭亦取音同以繩縻取禽獸冥然使不覺失其讀矣云以繩縻取禽獸之名者廣雅釋詁云冪覆也說文糸部云縻牛轡也後鄭意此冥爲冪之借字取禽獸當掩覆羈縻之故謂之冪與本職注局絹禽獸之義略同

庶氏下土一人徒四人庶讀如藥煮之煮驅除毒蠱之言書不作蠱者字從聲疏注云庶讀如藥煮之煮驅除毒蠱之言書不作蠱者字從聲者毒蠱葉鈔釋文作毒蟲羣經音辨同並誤段玉裁云讀如煮擬其音耳云驅除毒蠱之言者以蠱與庶同音

爲訓必先云讀如蕘而後庶與蠱同音也蠱今音讀如古古音如居上聲是以與蕘略同庶氏既掌除毒蠱則其官曰蠱氏可矣而書不作蠱字者庶與蠱音同是以作庶氏云字從聲者謂古人用字但取其同聲者六書之假借如是也

穴氏下士一人徒四人穴搏蟄獸所藏者

疏

注云穴搏蟄獸所

藏者者說文穴部云穴土室也賈疏云凡獸蟄皆藏在穴中故以穴爲官名使取蟄獸也

翊氏下士二人徒八人翊鳥翮也鄭司農云翊讀爲翅翼之翅

疏注云翊鳥翮也者說文羽部云翮羽莖也後鄭以本職云以

時獻其羽翮故釋翊爲鳥翮鄭司農云翊讀爲翅翼之翅者段王裁云司農說與鄭君異司農謂翊卽翅字翅者翼也如禩卽

祀字勛卽勳字之比是聲支聲同在古音支佳部是以大鄭如此云也鄭君載之者廣異義也呂飛鵬云說文翬鳥之彊羽猛者此經翬氏職掌攻猛鳥故取鳥之猛者以名官翬翅雖同聲而義有別說文云翬翼也或從氏作抵詒讓案許說又與二鄭異而義較長

柞氏下士八人徒二十人柞除木之名除木者必先刊剝之鄭

司農云柞讀爲音聲啗啗之啗屋竿之竿

疏注云柞除木之名

者詩周頌載芟篇載芟載柞毛傳云除木曰柞後漢書馬融傳廣成頌焚萊柞木李注云柞邪斫木也文選張衡西京賦柞木剪棘李注云賈逵國語注曰槎邪斫也柞與槎同案李說是也說文木部云柞柞木也槎表斫也國語魯語里革曰山不槎蘖

韋注云槎斫也柞卽槎之段字云除木者必先刊剝之者刊舊
本作按釋文同宋大字本錢鈔本明注疏本並作刊與賈疏合
今從之疏云見其職云夏日至令刊陽木而火之冬日至今令剝
陰木而水之是先刊剝之案賈說是也古無從手之按詳夏官
敘官疏鄭司農云柞讀爲音聲啗啗之啗屋柞之柞者段玉裁
改讀爲爲讀如云謂讀如此二音也今各本作讀爲誤除木曰
柞又見毛詩不當易爲啗柞二字丁晏云考工記注先鄭云柞
讀爲迫啗之啗典同注杜子春柞讀爲行扈啗啗之啗後鄭謂
聲迫柞出去疾也爾雅釋鳥行扈啗啗郭注諸扈皆因其毛色
聲音以爲名案段校是也屋柞詳匠人疏

雉氏下士二人徒二十人書雉或作夷鄭司農云掌殺草故春

秋傳曰如農夫之務去草芟夷蘊崇之又今俗間謂麥下爲夷
下言芟夷其麥以其下種禾豆也玄謂薙讀如鬚小兒頭之鬚
書或作夷此皆翦草也字從類耳月令曰燒薙行水謂燒所芟
草乃水之疏薙氏者薙唐石經初刻誤從竹後磨改從甘釋文
云字或作薙葉鈔本作李或作薙則是謂李軌本徐養原云今
本云字或作薙同謂薙字他書有作薙者其字同耳若如葉本
則李下須有云字其義乃通釋文中凡言字或作某者乃辨別
字體也若列諸本異同則云本或作某案徐說是也 注云書
薙或作夷者惠棟云漢書揚雄傳甘泉賦云列新薙於林薄服
虔曰新薙香草也薙夷聲相近師古曰新薙卽辛夷左昭十七
年傳曰五薙爲五工正夷民者也正義服虔曰薙者夷也夷平

也孔穎達云雉聲近夷雉訓夷夷爲平鄭司農云掌殺草者此據夷字作訓也云故春秋傳曰如農夫之務去草芟夷蒞崇之者左隱六年傳文杜注亦訓夷爲殺與先鄭義同引之者證夷爲殺草之義詳稻人疏云又今俗間謂麥下爲夷下言芟夷其麥以其下種禾豆也者稻人注云今人謂禾下麥爲夷下麥言芟川其禾於下種麥也義與此同段玉裁云仲師從作夷之本故引春秋傳芟夷蒞崇又引方俗語言麥下禾豆爲夷下禾豆與稻人注禾下麥爲夷下麥互相發明謂此夷氏之夷卽稻人芟夷之夷也云玄謂雍讀如鬚小兒頭之鬚書或作夷者後鄭從雍不從夷也文選張衡東京賦亦作雍氏平子讀與後鄭同惠棟云說文佳部云古文雉从弟篆文弟夷字相似荀氏易渙

六四云匪弟所思見釋文今本作夷說文髟部云髟髮也大人日髟小兒日髟盡及身毛日髟段玉裁云鄭謂薙字之音義如髟小兒頭之髟其釋夏日至而薙之日以鈎鎌迫地芟之是卽如髟小兒頭之說也案段說是也云此皆剪草也字從類耳者說文艸部云薙除艸也後鄭意正本作薙或本作夷義並通不必定從或作也段玉裁云謂薙夷二字皆爲剪草之語言其類同而字異類者周禮序所云字之聲類也薙夷同在古音脂微齊皆灰部不特同部而且同音後鄭讀如髟以伸其義讀薙如髟卽讀夷如髟也案賈以從類爲形段以從類爲聲段是也此鄭謂薙夷相類故云皆剪草也引月令曰燒薙行水者仲夏令文賈疏云引之者欲見薙草須燒之又須水之之意也云謂

燒所芟草乃水之者舊本謂上行非字今依蜀石經及宋大字
本錢鈔本注疏本刪段玉裁云謂岳本作非謂誤也月令注曰
欲稼萊地先薙其草卓乾燒之至此月大雨流水潦畜於其中
則草死不復生而地美可稼引薙人職夏日至而薙之如欲其
化也則以水火變之然則周禮於夏至薙之記於六月行水事
正相成故此注云燒所芟草乃水之與月令注相應也岳本非
謂不辭

荜蒺氏下士一人徒二人鄭司農云荜讀爲搯蒺讀爲薺蒺之
蒺謂巢也立謂荜古字從石折聲疏注鄭司農云荜讀爲搯蒺
讀爲爵蒺之蒺謂巢也者說文手部云搯搔也二曰投也呂氏
春秋求人篇嗚噍巢林高注云巢蒺也段玉裁云搯它歷反音

剔爵族謂爵巢也。砮族卽公羊宣元年何注所謂撻巢也。詒讓案撻巢亦見春秋繁露五行順逆篇。丁晏云文選吳都賦砮墜山谷。劉注云言其如砮墜而墜。落山谷者。陳壽祺云雀窠謂之族。猶蠶箔謂之族。皆謂物湊集有所藉也。說文族行蠶尊是其義。云玄謂砮古字從石折聲者。段玉裁云鄭君謂砮古字者。此因大鄭義申之。謂砮撻古今字。非有二字也。釋文云李軌又思亦反。此從析作砮之本。又云徐文列反。沈勅徹反。此從折作砮之本。陸氏以前寫本不一。作音者各異。陸氏未能決擇耳。說文石部曰砮。上摘山巖空青珊瑚墮之。從石折聲。周禮有砮族。氏其云上摘空青珊瑚者。釋從石之故也。王念孫云說文玉篇廣韻集韻皆有砮。無砮。許鄭並云從石折聲。則當作砮。明矣。砮前

它歷反唯李軌本誤作砦故音思亦反玉篇廣韻砦字並他歷
丑列二切文選吳都賦砦陟山谷李善音効列切而皆無思亦
之音不從李軌也賈疏曰鄭謂砦古字從石折聲者以石投擲
毀之故古字從石以折爲聲然則砦族氏掌覆天鳥之巢義取
毀折而非取分析說文砦上槩山巖空青珊瑚墮之亦是毀折
之義非分析之義砦或通作折管子地數篇曰上有丹沙者下
有黃金上有慈石者下有銅金上有陵石者下有鉛錫赤銅上
有赭者下有鐵君謹封而祭之然則與折取之遠矣折取之者
謂擿取黃金鉛錫銅鐵也墨子耕柱篇曰昔者夏后開使蜚廉
折金於山以鑄鼎於昆吾折金者擿金也猶說文言上擿山巖
空青珊瑚也折卽砦之借字則砦之從折而非從析益明矣檀

弓吉事欲其折折爾鄭讀折折爲提提與摛古同聲若之讀爲摛猶折折之讀爲提提也折與摛聲相轉王說是也

翦氏下士一人徒二人翦斷滅之言也主除蟲蟲者詩云實始

翦商疏翦氏者以下四職並除蟲之官注云翦斷滅之言也

者說文羽部云翦羽生也刀部云前齊斷也此翦卽前之借字云寸除蟲蟲者者此與下赤友氏並主除陸蟲故取斷滅之言以名官也引詩曰實始翦商者魯頌閟宮文鄭彼箋云翦斷也此引以證翦有斷滅之義

赤友氏下士一人徒二人赤友猶言抅拔也主除蟲豸自埋者

疏赤友氏者阮元云說文魃旱鬼也周禮有赤魃氏除糞屋之物也詩曰旱魃爲虐許引周禮作赤魃者當是古文假借字許

所據故書作魃其義則爲除牆屋物而非旱鬼也段玉裁云物
讀精物鬼物之物故歐之之官曰赤魃氏許義亦與鄭異蓋賈
侍中說與案段說是也漢時蓋有謂此官掌歐鬼物者續漢書
禮儀志逐疫詞云赫女軀拉女幹赫赫赤聲近字並通也 注
云赤女猶言赫拔也者賈疏云拔除去之也呂飛鵬云鄭云赫
拔與訖云除牆屋之物義同說文手部赫裂也拔擢也段玉裁
云以赤女爲赫拔六書之假借也赫音采昔反則赫同籍案段
說是也鼈人云以時籍魚鼈龜蜃凡狸物除狸蟲謂之赫與刺
狸物謂之籍音義略同云主除蟲豸自埋者者蜀石經埋下有
藏字爾雅釋蟲云有足曰蟲無足曰豸埋謂埋藏於牆屋者赤
友氏主除之也與翦氏主除蟲蠹爲不埋之蟲異

蝮氏下士一人徒二人鄭司農云蝮讀爲蟻蟻蝦蟇也月令曰
 蝮蝮鳴故曰掌去龍龍龍龍蝦蟇屬書或爲掌去蝦蟇之謂蝮
 今御所食蛙也字從蟲國聲也蟻乃短狐與疏注鄭司農云蝮
 讀爲蟻者夏小正云四月鳴蟻蟻也者長股也或曰屈造之屬
 也小正此文與月令孟夏蝮蝮鳴正相應蟻即蝮字先鄭讀與
 彼正同說文虫部蟻重文蝮云蟻又從國亦以蟻蝮爲一字然
 訓蟻爲短狐則與先鄭說異云蟻蝦蟇也者此與夏小正傳或
 說同淮南子說林訓鼓造辟兵高注云鼓造一曰蝦蟇鼓造即
 屈造也說文虫部云蝦蟇蟇也爾雅釋蟲云蟹蟻郭注云蛙類
 又釋魚鼈蠃蟻蟾諸注云蟾諸似蝦蟇居陸地神農本艸經及月
 令孔疏引李巡說並以蟾諸爲即蝦蟇非也先鄭引月令以爲

說則亦不以蝦蟇爲詹諸矣引月令曰螻蝈鳴者孟夏令文段
玉裁改蝈爲蟻云司農所據禮記蓋作螻蟻案段說是也杜氏
玉燭寶典引月令章句云螻蟻鳴螻蟻蛄蟻蟲鼃之屬也字正
作蟻蔡說亦以蟻爲鼃屬鄭本仍作蝈注云螻蝈蛙也說與先
鄭蔡氏異呂氏春秋孟夏紀亦云螻蝈鳴高注云螻蝈蝦蟇也
高說與先鄭同云故曰掌去鼃蝈鼃蝈蝦蟇屬者先鄭意本職
云掌去鼃蝈鼃蝈雖非蝦蟇而實其屬類故名其官爲蟻氏也
說文蝈部云鼃蝦蟇也廣雅釋魚同則以鼃與蝦蟇爲一古今
韻會舉要引說文作鼃蝦蟇屬則又與先鄭說同漢書武帝紀
載元鼎五年鼃蝦蟇鬪明二物相類而別依後鄭本職注以蝈
爲耿蝈則蝦蟇也鼃也蝈也三者各異物先鄭以鼃蝈爲一物

後鄭不從也云書或爲掌去蝦蟇者謂本職云掌去鼃鼃故書或本作掌去蝦蟇與官名蟻氏正相應也云玄謂蝻今御所食蛙也者本職注云齊魯之間謂鼃爲蝻玉燭寶典引古今字詁云鼃今蛙注蝻也後鄭意此官名字當從蝻而蝻又非蝦蟇不當如先鄭說也訓蝻爲蛙與夏小正傳訓蟻爲長股同此上文及本職注鼃字並不作蛙惟此獨異疑傳寫之譌王應麟云漢書霍山曰丞相擅減宗廟羔菟鼃詒讓案本草別錄云鼃一名長股生水中陶注云鼃其類最多一種黑色南人名爲蛤子食之至美又一種小形善鳴喚名鼃子此則是也廣雅釋魚云鼃蝻長股也案急就篇水蟲科斗鼃蝦蟇顏注云鼃一名螻蝻色青小形而長股據鄭說漢時以鼃供御則當卽指陶氏所謂蛤

子者爾雅郭注之青蛙亦其類也云字從蟲國聲也者蟲當爲
虫蝮字從虫形而諧國聲於六書屬形聲也云蝮乃短狐與者
明蝮與蝮別亦破先鄭說也說文虫部云蝮短狐也似鼈三足
以气射害人賈疏云案莊公十八年秋有蝮服云短狐南方盛
暑所生其狀如鼈古無今有含沙射人入皮肉中其瘡如疥徧
身中濩濩或或故爲灾禮曰惑君則有案五行志劉向以爲蝮
生南越由齊姜淫惑莊公故生於魯

壺涿氏下士一人徒二人壺謂瓦鼓涿擊之也故書涿爲獨鄭
司農云獨讀爲濁其源之濁音與涿相近書亦或爲濁疏注云
壺謂瓦鼓者謂鼓匡中空如壺猶輪人注以藪爲藪空壺中也
一切經音義引埤蒼云藪鼓柷也瓦鼓名壺與鼓柷名藪从壺

爲形義亦相類知用瓦鼓者本職云炮土之鼓是也云涿擊之也者說文支部云殺擊也木部云椽擊也受部云殺椎擊物也涿與殺椽殺音義並相近擊謂擊鼓作聲云故書涿爲獨鄭司農云獨讀爲濁其源之濁者賈疏云先鄭雖讀涿爲濁聲轉字誤故爲濁猶從涿爲義故後鄭引之在下濁其源大玄經文也段玉裁云故書涿作獨司農從作獨之本讀獨爲濁其源之濁者此據本職以焚石投之以牡棹午貫象齒而沈之而云也案段說是也云音與涿相近書亦或爲濁者段玉裁改濁亦爲涿云此又別一說獨之音與水流滴涿字音相近而書亦或爲涿是以鄭君從作涿之本釋壺以瓦鼓釋涿以擊此據本職以炮土之鼓毆之而云也各本注作書亦或爲濁誤案段校是也徐

養原說同後漢書馬融傳廣成頌亦作壺涿則馬季長已定從涿後鄭亦本師讀也

庭氏下士一人徒二人庭氏主射妖鳥令國中絜清如庭者也

疏注云庭氏主射妖鳥令國中絜清如庭者也者葉鈔本釋文絜作潔與宮人注不合不足據說文广部云庭宮中也宮庭之中中常婦除絜清此宮主射妖鳥言欲使國中絜清如宮庭之中故謂之庭氏

銜枚氏下士二人徒八人銜枚止言語囂譁也枚狀如箸橫銜之爲禮結於項**疏**銜枚氏者賈疏云案其職云大祭祀令禁無囂亦是禁戒之事故在此也注云銜枚止言語囂譁也者凡

人口銜枚則不得言語本職云掌司囂明主禁言語囂譁之事

故以銜枚爲名漢書高帝紀顏注云銜枚者止言語囂譁欲令
敵人不知其來也文選吳都賦云銜枚無聲云枚狀如箸橫銜
之爲纒結於項者爲纒舊本作爲之纒宋蜀大字本無之字與
釋文合今從之大司馬注義同賈疏云纒謂以組爲之繫著兩
頭於項後結之阮元云詩東山釋文引此注云枚如箸橫銜之
於口爲纒絜於項中纒上亦無之枚下并無狀今本皆衍結作
絜古字也當據以訂正段玉裁云大司馬職注亦曰有纒結項
中顏氏漢書注引作纒結於項云纒者結礙也絜纒也爲結組
纒項也勝於賈本賈說案阮段校是也互詳大司馬疏

伊耆氏下士一人徒二人伊耆古王者號始爲蜡以息老物此
主王者之齒枚後王謙伊耆氏之舊德而以名官與今姓有伊

耆氏疏伊耆氏者賈疏云案其職云掌其杖杖老者所依杖是
長老之方故在此 注云伊耆古王者號者明堂位云土鼓蕢
桴葦籥伊耆氏之樂也鄭彼注云伊耆氏古天子有天下之號
也曲禮孔疏引熊安生云伊耆氏即神農氏也又郊特牲疏引
皇侃云神農伊耆一代總號此皆以伊耆氏爲神農氏而郊特
牲釋文云伊耆或云即帝堯是也易繫辭孔疏引帝王世紀云
帝堯陶唐氏伊祈姓伊祈即伊耆二者並無塙證故鄭此注及
明堂位注並不質言也云始爲蜡以息老物者郊特牲云伊耆
氏始爲蜡籥章云國祭蜡則飮豳頌擊土鼓以息老物賈疏云
取息老物證伊耆供杖於老者之事故也云此主王者之齒杖
後王議伊耆氏之舊而以名官與者後王謂伊耆氏後以王

者鄭意此伊耆氏主王齒杖與始蟠息老物義相近或卽識古王者之舊德而以名官莊子胠篋篇古帝有祝融氏而高辛火正亦名祝融是以帝王號名官之例也云今姓有伊耆氏者鄧名世古今姓氏書辯證云伊耆亦作伊祈帝堯號也後因氏焉魏孝文時魏懷州民伊耆苟聚眾於重山作亂洛州刺史討滅之是也

大行人中大夫二人小行人下大夫四人司儀上士八人中士十有六人行夫下士三十有二人府四人史八人胥八人徒八十人行夫主國使之禮疏大行人者以下至掌貨賄十一職並掌四方朝聘賓客及使命往來之官亦屬秋官者以大司寇掌佐王刑邦國詰四方故以義類屬之云小行人下大夫四人者

此與司僕行夫唐石經宋蜀本岳本嘉靖本並踐行今從注疏
本賈疏云亦謂別職同官故四官各有職司而其府史胥徒也
詒讓案國語周語云敵國賓至關尹以告行理以節逆之章注
云理吏也行理小行人理通作李左襄八年傳一介行李杜注
云行李行人也又襄十四年傳云夏書曰適人以木鐸巡于路
正月孟春於是乎有之杜注云適人行人之官也漢書食貨志
云孟春之月行人振木鐸徇于路以采詩獻之此文與左傳略
同亦以適人爲行人足證杜說方言劉歆與揚雄書云三代周
秦軒車使者適人使者以歲八月巡路求代語僮謠歌戲又雄
谷書云嘗聞先代輜軒之使奏籍之書皆藏於周秦之室蓋行
人乘輜軒而巡行天下因謂之適人適輜適字並通適人亦稱

迎人說文丁部云迎古之適人以木鐸記詩言是也書庸征僞
孔傳以適人爲宣令之官肌說不足據 注云行夫主國使之
禮者案本職無主禮之文疑禮當作事其職云掌邦國傳遽之
小事熾惡而無禮者凡其使也必以旌節是國使之事也

環人中士四人史四人胥四人徒四十人環猶圍也主圍賓客
任器爲之守衛疏環人者此職與夏官環人字同而義則異彼
環人主致師此環人主環衛賓客是其異也 注云環猶圍也

者呂氏春秋愛士篇晉人已環穆公之車矣高注云環圍也呂
飛鵬云夏官環人注云環猶卻也蓋取卻敵之義此注云猶圍
也蓋取環繞之義云主圍賓客任器爲之守衛者本職云有任
器則令環之先鄭注云四方人有任器者則環人主令徇環守

之圍繞與徇環義同後鄭卽本先鄭義

象胥每翟上士一人中士二人下士八人徒二十人通夷狄之

言者曰象胥其有才知者也此類之本名東方曰寄南方曰象

西方曰狄鞮北方曰譯今摠名曰象者周之德先致南方也疏

象胥每翟上士一人者翟狄字通詳內司服疏翟者蠻夷閩貉

戎狄之通稱猶司隸職蠻閩夷貉四隸通謂之四翟之隸也沈

彤云象胥上士每翟一人六翟則六人云中士二人下士八人

徒二十人者沈彤云中士每翟二人則十二人下士每翟八人

則四十八人徒每翟二十人則百二十人注云通夷狄之言

者曰象者大行人先鄭注云象胥譯官也大戴禮記小辯篇云

傳言以象反舌皆至是象爲通夷狄言語者之通稱也國語周

語謂之舌人韋注云舌人能達異方之志象胥之官是也續漢書百官志引干注云今鴻臚據晉官况周也云胥其有才知者也者大行人注云胥讀爲諧胥謂象之有才知者也此不云讀爲諧者文略詳天官敘官疏云此類之本名東方曰寄南方曰象西方曰狄鞮北方曰譯者王制云五方之民言語不通嗜欲不同達其志通其欲東方曰寄南方曰象西方曰狄鞮北方曰譯鄭彼注云皆俗聞之名依其事類耳鞮之言知也今冀部有言狄鞮者呂氏春秋慎勢篇云凡冠帶之國舟車之所通不用象譯狄鞮方二千里鞮又作鞮淮南子齊俗訓雖重象狄鞮不能通其言高注云象狄鞮譯也賈疏云寄者賓主不相解語故寄中國於東夷又寄東國語於中國使相領解云象者傳南方

於中國還象中國以傳之與南方人語則還象南方語而傳之
云狄鞮者鄭波注云鞮之言知也雖不訓狄狄即敵也謂言語
相敵使之知也云譯者譯即易謂換易言語使相解也云今總
名曰象者周之德先致南方也者釋六翟通名象胥之義大行
人注云周始有越重譯而來獻是因名通言語之官爲象胥云
越裳爲南方之夷故此云周之德先致南方也

掌客上士二人下士四人府一人史二人胥二人徒二十人

掌訝中士八人府二人史四人胥四人徒四十人訝迎也賓客

來主迎之鄭司農云訝讀爲跋者訝跋者之訝疏注云訝迎也

者前訝士注同云賓客來主迎之者據本職文聘禮記注云訝
主國君所使迎待賓者如今使者讓客國語晉語云曰季舍于

逆旅甯嬴氏韋注云旅舍也逆客而舍之也左傳文五年杜注及孔疏引賈逵孔晁並以爲掌逆旅之大夫案訝逆同義掌逆旅大夫疑卽此掌訝也荀子榮辱篇云監門御旅訝御字亦通御旅蓋逆旅之賤役或卽此官之胥徒與鄭司農云訝讀爲跛者訝跛者之訝者賈疏云此公羊傳文時晉使卻克聘齊卻克跛齊使跛者往御御亦訝故讀從之也段玉裁云他經多作御惟周禮作訝古訝音同御也說文言部日訝相遇也引周禮諸侯有御訝公羊傳跛者訝跛者正義所見本作御跛者詒讓案今本公羊成二年傳訝作逆輸人先鄭注亦引作訝公羊釋文云逆本又作訝穀梁傳作御賈所見公羊文蓋與穀梁同

掌交中士八人府二人史四人徒三十有二人主交通結諸侯

之好疏注云主交通結諸侯之好者本職云掌邦國之通事而結其交好是也

掌察四方中士八人史四人徒十有六人疏掌察四方中士八人者職闕四方八人則每方二人也賈疏云蓋督察邦國之事前懋云此官以掌察四方四字爲名非名掌察也此下又有掌貨賄賈疏出掌察四方掌貨賄七字則賈氏所見經文必是掌察四方不如今本止作掌察也案俞說亦通但本職止存掌察二字唐蜀石經已如是疑漢唐舊讀皆以四方屬下爲句本職文闕無可質證矣

掌貨賄下士十有六人史四人徒三十有二人疏掌貨賄者職闕蓋掌大府內府九貢之貨賄又內府云凡四方之幣獻之金

玉齒革兵器凡良貨賄入焉皆是也國語晉語云王者成其德而遠人以其方賄歸之故設此官以掌之亦與外府內府為官
 職也書洪範八政二曰貨孔疏引鄭書注云貨掌金帛之官若
 周禮司貨賄是也案掌司義同司貨賄即此官也云史四人者
 莊存與云官有史無府亦錄其幣書耳薦陳而輸受者惟宰及
 大府內府玉府也

朝大夫每國上士二人下士四人府一人史二人庶子八人徒
 二十人此王之士也使主都家之國治而命之朝大夫云疏朝
 大夫者賈疏云在此者案其職云掌都家之國治固有邦國賓
 客在秋都家之治亦在此詒讓案此三公王子弟采地私臣之
 聽事於朝者俞正燮謂若漢郡國邸吏是也以其得以職事

於國故附列秋官之末鄭以爲王臣未審云庶子八人者賈疏云庶子者蓋亦主采地之諸子今在府史之下蓋官長所自辟除也案賈說非也庶子者蓋都家貴族之子弟未命而在官者若左昭二十七年傳楚沈尹成帥都君子是也未命則與庶人在官者同故敘於府史之後徒之前當胥之處大射儀賓受爵于筵前宰胥薦脯醢賓升筵庶子設折俎彼庶子與宰胥爲聯事亦以其職略相等也鄭彼注以爲夏官之諸子非也疏以此庶子爲主采地之諸子疑涉彼注而誤詳宮伯及諸子疏注云此王之士也使主都家之國治而命之朝大夫云者賈疏云此云每國上士二人是王朝之士以其主采地之國治事重則名之日朝大夫云畿內三等采地地雖有百里五十里二十五

里摠謂之國若王制云九十三國也吳廷華云此居朝廷而掌都家之治者曰朝大夫猶邑宰而曰邑大夫云爾詒讓案此國當專指大都三公及王子弟之采地言之與王制之國爲三等采地之通稱者異此官亦非王朝之士鄭賈說並誤

都則中士一人下士二人府一人史二人庶子四人徒八十人
都則主都家之八則者也當言每都如朝大夫及都司馬云疏
都則中士一人者此都謂小都卿之采地其家邑大夫之采地亦兼有之俞正燮謂都則中士一人卽每都置朝大夫一人云
序官文每國爲一句都爲一句言國與都之朝大夫其人不同其職掌同也朝大夫者如言山衡林衡川衡澤虞每國者如言大山大林麓大川大澤大藪都者如言中山小山小林麓小林

麓中川小川中澤中藪小澤小藪也其職皆兼國都言之今別都則爲一官而闕其職掌則朝大夫之職掌與序官不相應故知注說失之案俞說是也此卽小都之私臣爲朝大夫者故齋降於大都之朝大夫一等也此經當與前朝大夫爲一條鄭分爲二失之 注云都則主都家之八則者也者鄭以都則爲官名故取大宰八則治都鄙爲釋云當言每都如朝大夫及都司馬云者鄭旣謂都則是官名則每都各有此官故據朝大夫言每國上中下土若干人與夏官都司馬敘官言每都上中下土若干人之例擬於官名下補每都二字也

都士中士二人下士四人府二人史四人胥四人徒四十人家士亦如之都家之士主治都家吏民之獄訟以告方士者也亦

周禮正義

禮六十五

三五 禮記卷之四十一

五百四十一

當言每都疏都士者此下並都家掌刑之官以其家受重命於王者故不屬方士而附秋官之末云家士亦如之者唐石經跳行別爲一經宋蜀本建附釋音本岳本嘉靖本同今從注疏本注亦以都家并釋則鄭本不分爲兩經明矣此亦每家中士二人下士四人府二人史四人胥四人徒四十人喪服卿大夫家臣有室老有士注云士邑宰也與此家士異右秋官之屬卿一人中大夫四人下大夫八人上士二十六人中士百六十四人下士二百五十一人府七十人史百五十九人胥百六十五人徒二千三百八人賈四人五隸六百人凡正官自卿至庶人總三千六百六十人此外朝大夫每國上士二人下士四人府一人史二人庶子八人徒二十人都則依鄭注每都中士一人下

士二人府一人史二人庶子四人徒八十人都士每都中士二
人下士四人府二人史四人胥四人徒四十人家士每家中士
二人下士四人府二人史四人胥四人徒四十人皆有員數無
總數不可計大凡可計者總三千六百六十人 注云都家之
士主治都家吏民之獄訟以告方士者也者都士主治大都小
都王子弟公卿采地之獄訟家士主治家邑大夫采地之獄訟
也賈疏云此官雖闕以其稱士則知主獄必知王家不置都士
而云都家之士者以其都司馬使王臣爲之家司馬家自置司
馬以司馬主軍事重故王置都司馬此刑事輕於軍故都家王
皆不置都士但已有方士主其獄故使都家之士以獄告也案
都司馬亦家臣賈說非是又賈夏官秋官疏以此都士家士爲

周禮正義

禮六十五

三百四十四

王臣尤與此疏說迂詳彼疏方士職云凡都家之士所上治則
主之故知以告方士也云亦當言每都者謂當如朝大夫都司
馬例也

周禮正義卷六十五終